

靜
志
居
詩
話

靜志居詩話卷十五

秀水朱竹垞先生著

扶荔山房編輯

羅萬化字一甫會稽人隆慶戊辰賜進士第一歷

官禮部尚書贈太子少保謚文懿有世澤編

唐宋科目繁多至明而始終所重惟甲第志科名盛事者首述吉水莆陽而於越山陰自諸文懿大綬而後榜五發邑人居其三焉傳聞三公俱同席硯之友不可謂非盛事已文懿擬此日不再得云落景無返輪奔星少回光綠髮不戀人轉眼化爲蒼所以志士心努力及方

青心方言言 卷一 三
剛恒恐歲遲暮蘭蕙不得芳膏火還自煎山木亦自戕
我謀一以乖終身失其臧大道本希聲至人貴含章豈
其魚目珍而登君子堂登高豈無梯濟深豈無航愚者
貴速至聖人寶其常虛牖展素書古人未云亡無爲守
躊躇徒貽過時傷

王家屏字忠伯大同山陰人隆慶戊辰進士歷官
禮部尙書文淵閣大學士贈少保諡文端有復
宿山房集

宋制祖宗翰墨儲藏於玉堂之署觀陳騏中興館閣前

後錄道君墨跡俱存此康譽之得題年年花鳥無窮恨
盡在蒼梧夕照中之句也迨元而奎章宣文之閣舊典
不改明則藏之大內詞臣末由覩矣萬歷九年帝御文
華殿宣召入直史臣五人文端居首其餘修撰則沈公
懋孝張公元怵編修則劉公元震鄧公以讚也旣進見
示以景陵御筆元兔圖圖以淡墨作滿月胎上有桂子
垂枝下藉輦草兔居其中並臻妙境諭諸臣題詩於軸
并得用私印識之閱三日詩成進御自首輔張文忠外
凡三十有五人當日諷詠優游不事促迫綵花銀葉賜

予便蕃自永宣以來詞林盛事遇此罕矣長陵四馬詩
世傳爲江陵作今從館課集本正之文端立朝侃侃不
阿因一諫官力爭去位風節固不可及詩亦雍容和雅
不失正始之音

朱賡字少欽紹興山陰人隆慶戊辰進士歷官少
保兼太子太保吏部尙書文華殿大學士贈太
保加贈太傅諡文懿有集

明制閣臣始入東閣次進文淵閣武英殿謹身華蓋後
爲建極中極獨虛文華殿不拜惟永樂間權謹以孝行

拜斯殿學士此後則文懿公也是時定陵有意爰立二人先太傅文恪公暨馮文敏琦也蛟門閣老亟以密揭止帝曰此二臣皆美器當老其才用之乃改命文懿及文懿入賁捧各官爭論礦稅䟽難以裁答於是相傳以政府爲苦海矣文懿詩不載集中僅從館課錄得薊門行一首云曠騎窺青海天兵出薊門白草邊塵暗黃沙塞月昏悲笳風外曲哽咽不堪聞

于慎行字可遠更字無垢東阿人隆慶戊辰進士選庶吉士授編修歷修撰侍講左諭德侍讀學

士陞禮部侍郎改吏部拜禮部尙書入直東閣

卒贈太子太保諡文定有穀城山房集

東阿格律和平當正聲微茫之時能爲是調卽以詩高
選亦堪作相隆慶己巳太原丈夫化爲女子歌以識之
云太原有男子壯烈世所無身長九尺餘白皙好眉鬚
自負良家子募作材官徒腰中鞬韠劒橫擊當路衢并
州惡少年見之伏且趨一朝覽青鏡佗條空堂隅三日
不出戶忽然見彼姝綽綽芙蓉顏盈盈玉雪膚蛾眉娟
且長高髻墮馬梳脫我金鎖甲繫我繡羅襦掛我白貂

幘珥我明月珠委心懷嫵婉不惜健兒軀昔爲雲中鵠
今爲水上鳬昔者一何厲常關十石弧今者何柔曼巧
笑傾城都仰視浮雲馳變化不須與茫茫窺元運元黃
無乃渝世人但云好不必稱丈夫

附錄愚山云公於詩文春容宏麗一時推大手筆其
論古樂府曰唐人不爲古樂府是知古樂府也辭聲
相雜旣無從辨音節未會又難於歌故不爲爾然不
效其體而時假其名以達所欲言斯慕古而託焉者
乎近世一二名家至乃逐句形模以追遺響則唐人

所吐棄矣余間爲郊祀饒歌可數十首已而視之頗涉兒戲亦復不自了然遂焚棄之取其音節稍近者倣其一二謂之本調至近體歌行如唐人所假者不曰樂府則詩之而已矣夫唐人能爲而不爲今人能爲而遂爲之予奈何不能爲而爲也其論五言古詩曰魏晉之於五言豈非神化學之則迂矣何者意象空洞樸而不敢瑣軌塗整嚴制而不敢騁少則難變多則易窮古所謂鸚鵡語不過數聲爾原本性靈極命物態洪纖明滅畢究精蘊唐果無五言古詩哉余

既知其解矣而不能舍魏晉者取其可以藏拙且適
所便非能遂似之也海內賞真之士有以吾言爲是
者吾詩雖不觀可矣公生當慶歷之世又爲歷下之
鄉人其所論著皆箴歷下之膏肓對病而發藥夫惟
大雅卓爾不羣其是之謂乎

張位字名誠南昌人隆慶戊辰進士改庶吉士授
編修遷司業以糾江陵奪情謫徐州同知後累
官少保兼太子太保吏部尙書武英殿大學士
謚文端有叢桂山房彙稿

文端以持正忤江陵詩頗有憂危之語其詠射鵠云方寸能幾何當此亂族投有感其言之也旣罷相於東湖杏花村建閒雲樓吟眺自娛晚採青原之勝汎舟螺川野服簞車登覽竟日老僧不識爲宰相題詩懷鄒魯瞻門人胡廷宴守吉安從寺壁見詩始知之是亦佳話

沈思孝字純父嘉興人隆慶戊辰進士累官都察院右都御史兼兵部侍郎卒贈太子少保有行成郊居西征陸沉諸藁溪山堂吾美堂等集

先生封事尤觸江陵之怒杖畢卽加鐐鎖復下獄三日

始僉解發戍旣抵嶺南巡撫欲殺之以媚政府遽以尺
符召之行至恩平先生袖匕首示縣令曰巡撫必欲殺
我我當與俱斃不然伏尸軍府中令天下士大夫皆知
巡撫所殺也縣令密以告巡撫得不死蔡副使文範作
壯哉行送之其歸也胡元瑞贈詩云荳蔻花前千里夢
桄榔樹下十年人先生頗好鑒賞書畫言者遂劾其以
千金市王右軍真蹟一卷南箕貝錦可以意成也詩入
瑯琊四十子之列晚交姚叟士彝未免間作磬牙語

沈懋孝字幼真平湖人隆慶戊辰進士改庶吉士

歷南京國子司業謫兩淮鹽運司判官起河南
巡撫未任有淇林雅詠

晴峰樂府句摹篇倣不脫歷下窠臼餘體斐然能於同
中見異北固登望云北固樓前一笛風碧雲飛護建康
宮江南二月多芳草春在濛濛細雨中

朱孟震字秉器新淦人隆慶戊辰進士除南京刑
部主事歷郎中出知重慶府陞河南按察副使
累官通政使以右副都御史巡撫山西有郁木
生全集

秉器津津以詩家自許其在南曹結清溪社一時名士
聲應氣求所緝楮談續談餘談述先詰之舊聞綜同人
之麗句可謂好事也已春日金沙寺訪_杜孝廉元我云
春水金沙是舊遊春風黃鳥況相求馬蹄一逕穿雲入
花氣千林帶雨浮詞客雄文巴蜀檄故人清興剡溪舟
草堂蹤跡今猶昔好爲狂夫十日留

蔡文範字伯華瑞州新昌人隆慶戊辰進士歷官
廣東布政司參議有緡雲齋橐甘露堂集

青門近體雄渾絕倫送庫部朱陽和備兵甘肅云陰山

雪墮紫貂裘使者行邊大漠秋
陝右長城班定遠胸中
武庫杜荊州風吹獵火通
旣脫箠奏梅花落隴頭
哈密至今無敢論知君躍馬看吳鉤

沈位字道立吳江人隆慶戊辰進士改庶吉士授

檢討有柔生集

虹臺詩麗以則惜不永齡中秋一律云秋光長與翠華
連況是中秋更可憐城闕影高雲裏見芙蓉露冷沼中
妍誰家笛弄江南曲幾處鴻飛塞北天此夜清輝應莫
負人生能見幾回圓結語殆成讖也

郭子章字相奎泰和人隆慶辛未進士歷官都察院史巡撫貴州進兵部尚書有閩草畱草蜀草浙草晉草楚草黔草等集

青螺敷歷外臺而著書不輟詩嫌合格者少然勝於輓熟者多紀夢云西南欖槍明占在川之播何哉井底鼃不知有漢大黔中久愉恬崇朝忽摧挫聚黨嘯綦江一倡乃百和城市走豺豺平原起堀堞天子赫斯怒命將出右个猥予在田間未許支離卧馳驅竹王疆迅速等轉磨夜夢壯繆侯車騎儼相過倒屣延之入席分賓主

坐論賊無足虞粃糠易揚簸巢幕暫偷安積薪以待莖
及余入八番次第密搜邏衝風籜乍卷利七粉同剉豈
專帷幄謀一一神所佐從此半壁天蠻熨始退悞剌祠
敬事侯擊牲進香糯誰爲報侯功銘詩我所作

吳中行字子道武進人隆慶辛未進士改庶吉士
授編修以建言廷杖爲民尋起用遷右中允歷
洗馬管司業事進侍讀有復菴集

江陵奪情事在萬歷五年七月迨十月之朔彗星見大
內火於是旣望三日吳公疏上次日趙檢討用賢疏上

又次日艾員外穆沈主事思孝疏上江陵怒不可止而
諸公均受杖矣方杖時鄒進士元標疏復上一時士氣
持正若是許文穆以庶子充日講官爲吳趙二公餞鐫
玉杯一銘曰斑斑者何卞生淚英英者何蘭生氣追之
琢之永成器以贈吳公犀杯一銘曰文羊一角其理沉
黝不惜剖心寧辭碎首黃流在中爲君子壽以贈趙公
玉杯今不見犀者爲吾鄉何少卿黹音所得余嘗飲此
作歌

馮時可字敏卿松江華亭人隆慶辛未進士除刑

部主事改兵部歷員外郎中出爲貴州提學副
使再補四川提學副使調廣西湖廣參政有北
征西征金閬石湖巖棲雨航等集

元成詩極爲愚山所詆就全集而觀甫田彌望稂莠汗
萊獨五古一體尙有遺秉滯穗可供捃拾以比劉子威
翻覺勝之齋居雜述云兔狡能營窟鳩拙亦居巢兕虎
入帝苑麒麟走空郊玉石貌難分金錫質易淆三黜不
必愚九遷豈必豪屈伸由好惡人生在所遭鴻也費歌
噫雄也費解嘲何如與化遊小大並逍遙次章云白龍

下清淵漁者射其目白龜使清江卜者剝其腹元君違
神夢上帝惡魚服風波一失所雲雨迷率復芳草化爲
芻苦菜菹爲蓄世事如轉蓬人情多反覆冉冉百年中
愁居何能淑戊戌歸田雜感云箕斗不共垣有采芻爲
光蘭蕙不共根有氣相爲芳奈何同居者各自生肺腸
一笑亦見疑片語含鍼鉞不能相慰勞安望相頡頏長
林知天風大埜知天霜人生不相知何用接杯觴次章
云北風何其涼霜霰相與期薄暮侵衆卉芳鮮漸已辭
元髮不堪秋忽覺變青絲翩翩飛蓬征愴愴遊子思浮

雲一出山安知其所之故交皆已貴故心誰爲持酌水
置金甌焉辨澠與淄

劉伯淵字靜之號念庭慈谿人隆慶辛未進士除
泰興知縣遷工部主事歷員外郎中出爲江西
按察副使以病致仕歸年百餘歲卒有灌息亭
集

念庭於隆慶五年釋褐萬歷十六年卽引疾歸其八十
初度自嘲詩云謂我歸田早假令不早有何好幾人欲
歸不得歸黃犬東門添懊惱謂合彈冠出陶令折腰八

十日投閒已道宜休三揣分真成不堪七及百歲思陵
遣御史梁雲構存問念庭猶健步迎於門外謝恩畢騰
觚飛爵了無倦容崇禎十一年事也吳興有顯者家居
以厚幣乞言介壽念庭笑曰七十上壽毋乃太早乎浙
東西相傳以爲佳話云

吳丕顯字希文松江華亭人隆慶丁卯舉人承天
府通判有四畱軒集

希文奕葉青門一官散吏廉能著聞相傳初補學官弟
子製青苧布爲襴衫授兄子太僕炯以及孫曾家有青

青亭至今存焉襴衫之製諸生服之洪武二十四年三
易其式而後定用玉色絹布爲之寬袖皂緣繫絲垂襖
其後漸易以藍罕用布者矣題襟江樓云纜解春江曉
帆懸碧樹秋開窗千里月近檻一江流草色迎芳渡歌
聲逐去舟十年湖海夢猶自媿沙鷗

李應徵初名衷毅字伯遠嘉興人萬歷癸酉舉人

選授臨安教諭陞南國子博士有青蓮館澄遠
堂偶寄軒藿園寄茗薊易河梁兩都汗漫遊諸

集

弁州標榜前後五子而外廣爲四十子若似乎此外無
遺賢矣說詩者遇隆萬朝士或置不觀直以公安景陵
繼七子之派卽愚山之論亦不免焉不知隆慶諸臣已
力挽叫囂之習歸于平澹而定陵初年人皆修辭琢句
出入風雅之林若吾鄉李先生伯遠若下鄉先生允升
吳中歸先生季思嶺南區先生用孺尤卓然名家而閩
中徐惟和謝在杭曹能始均不爲楚咻所奪未見萬歷
初之不及嘉靖季也學者取諸家詩誦之庶幾論世有
權衡矣雜詩二首云所居雖廛市其後卽我園三周水

繞之水流何潺湲灌木旣羅戶密篠亦當軒境近心獨
遠悠然忘世喧夜枕鳴谿漁曉窗聞鳥言病不廢杯酒
時時亦開尊適意不在醉聊託餘生存次章云人生歡
日少戚戚恒多悲每憂此身沒身後無所遺所以百年
中役役無已時生時不行樂死復安所知墳墓且不保
智愚豈所期及此有盡軀壺觴聊自持秋雨日以深秋
草日以滋嚴霜候將至不樂欲何爲

附錄鍾廣漢云先生早察孝廉以才望自高旣艱於
一第老就四門博士其詩取材開寶匠法宏正是時

七子之習變爲叫呶公安之派漸已淫永先生激彼
頽波力返正始閎麗悲壯卓然成家

姚舜牧字虞佐烏程人萬歷癸酉舉人廣昌知縣
有承菴詩集

承菴以厚德聞鄉里事難悉書研究六經各有疑問詩
不專工然頗自喜

林章先名春元字初文福清人萬歷癸酉舉於鄉
有林孝廉集

初文少年行云君不見長安俠少年酒底高歌花底眠

靜志居詩話

卷十五

三

七

鬪雞走馬千金散何曾盜箇官家錢一朝忽報邊烽起
從軍不待別妻子但言割地與和親不愁戰死愁羞死
暮春燕子磯懷古云楊子江南燕子磯楊花燕子一時
飛六朝人物空流水兩晉山川盡落暉草色遠迷瓜步
去潮聲暗打石頭歸倚闌天際春三月惆悵東風動客
衣河水二絕云河水灣灣遶大堤堤邊楊柳一時齊可
憐折盡青青色長送行人出水西河水漫漫日夕流流
將清恨到青州不知郎在青州不妾在河西西盡頭豔
曲云百花臺上百花開妬柳驕桃一處栽惟有東風情

最好桃邊吹過柳邊來憶仲姬云逢時把酒對紅顏親
爲拈花插翠鬟今日登高人萬里教伊獨上望夫山

附錄曹能始云初文才士不欲以庸孝廉是處好爲
人排難解紛乃以無心獲罪謝司寇出之縲紲之中
適遼海有警累上書進奇策願身列戎行鍊甲兵備
緩急爲嫉者所繩觸憲而死詩如客情如春草無處
不堪生無家逢寺好多病見僧親曉烟常帶雨夜月
忽啼禽千山風雨裏一任子規啼皆絕酸楚 愚山
云閩中詩派宗子羽而彌繼之以撫倣蹈襲爲能事

初文才情跌宕於唐人格律時欲跳而去之要能不
爲閩派所羈紲可謂傑出者也世宗末倭寇犯閩初
文年十三上書督府求自試行間旣舉於鄉累上不
第走塞上從戚大將軍游座上作灤陽宴別序酒未
三巡詩序並就將軍持千金爲壽緣手散去挈家寓
金陵憤南曹曲法斷獄奮臂直之坐繫獄三年始出
關白之亂兩上書請用奇兵出海上勦賊報聞而已
繼又抗疏請止礦稅兼陳立兵行鹽之策帝感動下
內閣票擬舉行四明相承中人指閣其事密揭請逮

治望闕長歎憤懣撫膺卽日下獄暴病而死天下惜之

孫鑛字文融餘姚人萬歷甲戌進士歷官太子太保南京兵部尙書有居業編

月峰勤學過於士安慧業不如靈運觀其論詩有云韓退之於詩本無所解宋人目爲大家直是勢利他爾是何言與尸佼所云松柏之鼠不知堂密之有美樅者也

李化龍字于田長垣人萬歷甲戌進士除嵩縣知縣陞南京工部主事歷郎中改吏部出爲河南

提學僉事轉參議遷山東提學副使轉河南參政入爲太僕少卿陞右通政以右僉都御史督川湖雲貴以工部右侍郎督河道入爲兵部尙書加少保晉少傅兼太子太保卒贈太師諡襄毅有李襄毅公詩文彙

于田詩雖沿王李餘波然頗爽豁錢氏以其爲胡元瑞所稱譏其醜厚肥脂而棄之不錄未免矯枉也古行路難云君不見鳳凰臺前人已去後人來又不見長千里昔時樓榭今荆杞白雲蒼狗只須與世間反覆何所無

衛青未遇平陽奴
衛青旣貴平陽夫
萬事無如眼前好
守株待兔何爲乎
秋日飲張司理云
關河秋色晚蒼蒼
江畔逢君更憶鄉
海內弟兄多意氣
天涯雲物總淒涼
三山木落啼猿急
八月風高旅雁長
此夕燈前拚盡醉
故人明日耀相將

邢侗字子愿臨邑人
萬歷甲戌進士除南宮知縣
徵授監察御史出爲湖廣參議陞陝西行太僕
少卿有來禽館集

子愿雖有詩名爲書法所掩其言曰詩盛于嘉隆七子

以爲盡詞人之變矣然效趨者高趾促柱者急張往往不病而呻吟匪樂而强笑江河日下七子之盛七子之衰也蓋深中時流之弊特其自撰不見脫穎耳

鄒迪光字彥吉無錫人萬歷甲戌進士除工部主事歷員外郎中出知黃州府陞福建提學副使左遷浙江僉事調湖廣提學僉事有鬱儀樓調象巷始青閣諸集

彥吉詩材庸熟望而生憎絕句差清婉可誦行經舊院云曲房深院草萋萋不見嬌鶯滿樹啼惟有秦淮舊時

月夜深相送板橋西澄江舟行云夕陽秋色布帆懸霜
葉霜花送客船雨過鳥啼多竹外月明人語在沙邊

沈懋學字君典宣城人萬歷丁丑賜進士第一授
翰林修撰追諡文節有郊居遺藁

君典少任俠兼精技勇能上馬舞丈八稍嘗出塞縱觀
飛狐花馬險塞突爲曠騎追至幕南君典挾一矢命中
其黨乃不敢追旣登狀頭是年第二人卽江陵相君子
嗣修江陵方欲引以相助會奪情之舉君典貽書嗣修
謂相君天子師表奈何棄綱常飽人以口實嗣修惡不

能答也又貽書李尙書養河辭頗激切養河發書嘻笑而已君典乃與吳編修子道趙檢討汝師謀各上疏吳趙受杖而君典疏草爲人所持不果進然江陵業懷其異已而海內皆服其風節矣君典四十而夭年壽不將命爾而王元美作墓表屠緯真作傳欲傳會曇陽子昇真之確至以妖夢厚誣光明磊落之君典是豈愛人以德者邪次別曾直卿太史云年來多病檢方書夢入雙溪把釣餘賈誼豈能收涕淚嵇康元自愧龐疎翻愁草色春將晚却笑桃花錦不如戀別可堪風雨夕江天搔

首坐躊躇

余繼登字世用號雲衢交河人萬歷丁丑進士
庶吉士授檢討累官禮部尙書卒贈太子少保
諡文恪有澹然軒集

文恪古詩指陳時事鏗奇磊落卓然名家其在容臺值
國儲未建災變頻仍雷擊太廟樹南都火太白經天秦
晉齊皆地震西寧鐘不扣自鳴紹興地出血公俱直言
無諱先公冊封周藩公詩惟以旱熯爲憂不失古人贈
言之義聞公先是使周藩渡河舟膠枕折公告于神曰

使臣縱有罪神敢震驚龍節亦有佚罰維神實圖利之
禱畢而波恬若有翼舟以濟者斯亦異矣放歌云余雲
衢汝亦堂堂七尺軀二十脫穎薦鄉書三十挾策計吏
俱玉堂金馬此何地容汝久玷承明廬從汝執經已三
載天子不肯臨石渠吁嗟乎汝既無封侯骨拜相鬚謾
言虎可繡龍可屠屠龍繡虎竟何益况汝冥頑一技無
汝不見轅下駒一旦受君牧與芻爲君萬里爭馳驅少
府金錢等膏血太倉粟米煩徵輸念汝何功敢竊食十
二年費官家儲去夏一病幾長徂汝今不去將安需衛

河之滸茅可誅且營菟裘爲汝居貴何須誇趙孟富何
須羨陶朱從今且自脫樊籠三家市裏逡巡酒五畝園
中轂觶車免使微名挂朝簿耕田鑿井歌唐虞

鄒元標字爾瞻吉水人萬歷丁丑進士觀政日以

建言謫戍召授吏科給事中復以言事降南刑
部照磨升南兵部主事改吏部歷員外郎中罷
起大理寺卿升刑部右侍郎終都察院左都御
史卒贈太子太保吏部尚書諡忠介有存真集

先生晚總西臺入朝而躡御史前糾失儀先文恪公進

言曰元標在先朝直言受杖至今餘痛未除也德陵意解此事實錄不載附識於此簡羅公廓給諫云老去交情重懷君意轉深廿年青瑣客同賦白頭吟突兀千秋意蹉跎萬古心嚶嚶聞好鳥相喚出幽林

嚴一鵬字汝化無錫人萬歷丁丑進士除行人以貴州道御史按廣西以浙江道御史按浙江以福建道御史按山東歷官刑部左侍郎卒贈尚書有二知軒詩藁

尚書達尊居三特賜存問賦

不多調故清徹有長孫

福孫最善易著易通義頗發先儒所未發惜未刊行其
次中允繩孫也尚書彙流傳者寡從中允所抄得之清
明日棲隱園社集云春風吹拂柳絲斜佳節相攜感物
華共有錦囊題白雪未須金管勸流霞人行磴道初如
蟻日落湖帆盡載花散步踏芳歸任晚城南猶有未棲
鴉

馮夢禎字開之秀水人萬歷丁丑進士改庶吉士
除編修終南京國子祭酒有快雪堂集

馮公儒雅風流名高三席歸田之後間娛情聲伎箏歌

酒讌望者目爲神仙中人詩亦不蹈時習五古能盤硬
語尤見意匠經營同譜若沈君典屠緯真皆不及也

附錄愚山云開之不悅於時相左官外謫以南國子
祭酒歸遂不復出築室孤山之麓家藏快雪時晴帖
名其堂曰快雪歸田九年而卒爲詩文疎朗通脫不
以刻鏤求工

魏允貞字懋忠號見泉南樂人萬歷丁丑進士除
荊州推官選授山西道御史歷官右副都御史
兵部右侍郎巡撫山西

見泉以直節聞相傳其子廣微甫登賢書來省其父見
泉閉之廨中不許就禮部試曰此破犁犢也一得志必
隳我家聲矣後果然詩近恂疎論者謂遜其弟懋權岳
陽樓云洞庭天下水岳陽天下樓誰爲天下士飲酒樓
上頭

徐桂字茂吳長洲人居餘杭萬歷丁丑進士袁州
推官有大滌山人詩集

徐君詠物詩最繁富正如盈擔魔合羅僅供邨市癡兒
騃女把翫而已送義公結廬天台云海上海上栖禪境披雲

訪石橋一鉉依澗壑疎磬落山椒華頂經年雪松門半夜潮預愁支遁去誰與共逍遙

陳泰來字上交平湖人萬歷丁丑進士除順天府學教授遷國子監博士升禮部主事歷員外謫饒平典史泰昌卽阡贈光祿少卿有員嶠集

員嶠年十八舉於鄉十九釋褐歸娶賜內府金花燈籠知平湖事劉抑亭贈以對聯云秋進士聯春進士大登科後小登科鄉里榮之而公以氣節自許居太學忤江陵因三王竝封面質太倉于朝房又疏請建儲旣因計

典疏救孫鑪謫饒平典史陞辭就道賦詩有直道不緣
三黜收孤忠或受九重知卒時年三十有六耳謫歸日
夢至一山羣仙咸集賦詩云涼風拂拂白雲收宦海年
年幾日休剪紙作驢輕撥刺桃花洞口笑淹畱相與樂
甚旁一仙云汝乾淩子也後一年當再會于此覺而以
乾淩子自號踰年而沒

顧紹芳字實甫太倉州人萬歷丁丑進士改庶吉
士除檢討歷左春坊左贊善兼編修有寶菴集
實甫工於五律不露新穎矜鍊以出之頗有近於孟襄

陽高蘇門者喜陸彥先至云常憶秋風裏離尊共黯然
所期寧此地相見忽經年白眼時人過青山旅夢牽懸
知有新語羞屬蒯緱篇

沈九疇字箕仲鄞縣人萬歷丁丑進士除刑部主
事稍遷至郎中以按察副使提學江西歷官江
西左布政使有曲轅居詩集

箕仲以詩名重鄉里人有持所作謁文恭者輒笑曰家
弟安知文奚不就我族父嘉則以豐對樓詩屬余君房
論定君房報書云吾於詩僅窺其藩未入其室此事終

當屬君家箕仲於是嘉則詩經其刪敘及掌江西左轄
有中使來司權先檄諸長吏迎勅箕仲宣言曰勅諭中
使非敕守土吏也例不當迎中使爲氣沮一日中使移
書自稱予箕仲叱其使曰往惟高皇帝起吳時曾稱予
若中貴人何敢爾中使大懼立造謝其直節自遂亦文
恭所不如也

吳安國字文仲長洲人萬歷丁丑進士除真陽知
縣調永康徵授刑部主事歷員外郎中出爲寧
波知府升本省副使有葆光軒稟今是堂集

文仲純叔之子南夫之孫詩是家學其自序曰今之爲詩者矜一字之長競片語之巧張爲吾黨侈爲此道凌轢同列倚撫前人逞傲誕之風長浮華之習蕩閑檢而不顧棄率職其若遺則詩之爲蠹甚矣蓋嘉隆之間習氣如是稍有學識者知厭之

徐三重字伯同松江華亭人萬歷丁丑進士除刑部主事有天真齋草

伯同甫含雞舌遽返鶴沙息軌杜門研朱讀易其叔子禎稷出守夔州畏家誠之嚴不寄一物賦詩云丙穴有

魚堪作鰓因風不敢寄高堂足徵其守之介矣送友
教射洪云莫歎青氈作客寒聖朝猶是重儒官鼎烹鼎
食知多少誰似先生苜蓿盤江流欲盡是巴西巫峽荆
門烟樹迷遙計客帆行到處亂山斜日子規啼

張敬字爾和淄川人萬歷丁丑進士除中書舍人

遷禮部主事有儀部集

明初駙馬家有學錄嘉靖六年以禮部主事金克厚授
都尉謝詔經書後遂因之主事教習駙馬者爾和其一
也爾和不以詩名所作寥寥附文集之末聲律未能悉

諸然頗有生趣如曇花侵斷壁木葉響空廊鷺下啄寒
葦猿垂颭古藤故人滄海隔歸夢白雲深亦自流暢

朱應轂字德載濬縣人萬歷丁丑進士除東阿知
縣擢貴州道御史尋改山東道御史巡按貴州
再改雲南道御史巡按淮揚卒于官有槐石集
德載近體亦自羅羅清疎東流泉云清流環曲徑翠色
映遙岑山靜少人跡林深多鳥音雨餘雲破練月上酒
浮金千里來知己同遊愜素心

余寅字君房一字僧杲鄆縣人萬歷庚辰進士除

工部主事轉禮部員外歷郎中出爲陝西提學
副使遷山東參政入爲太常少卿有農丈人集
君房自負古文然與作者尙遠其於詩自謂涉其藩未
窺其奧亦自知之明相傳少日夢人曰君命同孔子年
至七十三無恙後二年奉川旌一麟持獻太守太守使
吏來白君房曰吾其死夫未幾果卒萬八處士斯同嘗
語予云

葉初春字處元吳縣人世居洞庭自號吳西主人
萬歷庚辰進士除廣州順德知縣擢兵科給事

中歷戶禮二科左右給事建言爲民天啓初追贈光祿寺少卿有吳西佚橐

先太傅文格公兩主鄉闈辛卯江西則吳西葉公爲副丁酉南畿則福清葉公爲副皆齊心一契關節不到者南昌徹棘之後葉公游讌必俱嘗偕過鐵柱觀羽士言是許旌陽鎖蛟處先公以豫章城築自灌嬰而李白詩有浪動灌嬰井潯陽江上風之句辨此井卽滕公遺跡葉公大以爲然先公賦五言有云潮生浪亦動疑是灌嬰井我言殊怪牒給事默心領蓋紀其事也旣而先公

掌容臺建儲之疏公私凡七十上最激切者劾鄧國泰
一章而定陵不以爲忤葉公以爭豫敎再疏去官進言
固有幸不幸也葉氏流芳錄二卷載公疏草及門弟子
輓詩公之韻語流傳特寡畱別徐少南一律云直北三
千里郵籤第一程渾忘相送遠誰道別離輕驛火抽帆
宿河水策馬行不知游子夢仍戀闔閭城手書存少南
族孫上舍惇復所楮墨漫漶以意補其闕字存之

車大任字子仁邵陽人萬歷庚辰進士除南豐知

縣歷南禮部郎中出知福州嘉興二府升浙江

按察副使進右參政有囊螢閣草

子仁見賞于吳明卿明卿贈之詩曰靈均忼慨追三后
太史憑陵陟九疑子仁深自喜也詩頗閒放無局促態
與臨清武雙溪云十載相逢章水濱與君同醉異鄉春
誰知今日清源道又向天涯別故人

附錄屠緯真云子仁詩色華而不豔音俊而不靡妙
得詩家所賞而不犯詩家所忌足稱擅場 陳玉叔
云子仁詩有風致而不傷于境有才情而不泥于氣
和平溫厚得古人之遺

袁年字子壽吳縣人萬歷庚辰進士除南京兵部
主事歷員外郎中出知青州府遷江西按察副
使轉雲南參政有觀槿齋集

子壽五言雖少精詣不墜胥臺家法豫讓祠云智伯已
亡後誰復君父讎傷哉一豫讓寧爲刺客流恩深國未
報形毀心獨留成敗不足料慘辱非所憂願爲知己殉
恥同肉食謀橋下試一擊廁中仍再投壘粉志始畢此
外庸何求嗟嗟二心人過此良足羞

臧懋循字晉叔長興人萬歷庚辰進士官南京國

子監博士有負苞堂詩選

何元朗臧晉叔皆精曲律元朗評施君美幽閨出高則
誠琵琶之上王元美目爲好奇之過晉叔謂琵琶梁州
序念奴嬌序二曲不類則誠口吻當是後人竄入元美
大不以爲然津津稱詡不置晉叔笑曰是惡知所謂幽
閨者哉嘗從黃州劉延伯借元人雜劇二百五十種又
購得楊廉夫仙游夢游俠游冥游彈詞悉鏤板以行序
言鄭若庸玉玦張伯起紅拂等記用類書爲傳奇屠長
卿曇花道白終折無一曲梁伯龍浣紗梅禹金玉合道

白終本無一散語均非是且言汪伯玉南曲失之靡徐
文長北曲失之鄙惟湯義仍庶幾近之而失之疎其持
論斷斷不爽詩亦不墮七子之習故雖從元美讌游不
入四十子之目亦磊落之士也

張恒字伯常蘇州嘉定人萬歷庚辰進士知茶陵
興國二州入爲刑部員外郎出知饒州府再知
建昌歷按察副使升太常少卿有明志藁

伯常自序其詩謂語不必工意不必遠古不必合今不
必離生不必名沒不必傳聊明吾志而已矣又曰譬諸

靜志居詩話

卷十五

天

扶藜山房

候至而物鳴若有使之而不能已者以寫其優柔愴蕩之思數語非知詩者莫能言也宜其古風磊落近體亦安詳比於同邑四先生似覺挺拔合歡詩云庭前雙瓊樹嘉實何離離鳳皇忽來巢載鳴復載飛鳥常比其翼樹亦連其枝宛若夫與婦燕爾良亦宜綢繆結深心嫵婉要終期登樓操瑟瑟琴音響一何諧人生在志合豈必及宴私和德家乃昌泰交亦若斯

張萱字孟奇博羅人萬歷壬午舉人授殿閣中書

歷戶部郎中有西園全集

孟竒熟於典故周見洽聞著書頗多其在西清重編文淵閣書目具載卷帙補前人之闕漏惜乎香厨所存已失其什九矣邗溝懷古云不盡邗溝水微茫日夜流潮連楊子渡烟接海門秋樹影浮荒堞蟬聲到客舟興亡無限意落木共悠悠

來知德字矣鮮梁山人萬歷壬午舉人以薦授翰林待詔有釜山詩集

待詔歌鹿鳴諸書不詳年歲詢之蜀人言是嘉靖中而黃徵君俞部分撰明史藝文志注云萬歷壬午或有所

據姑從之俟再考相傳待詔隱萬縣之求溪二十九年
注易始就今其書盛行而詩非專務易義亦非創獲蓋
僻在一隅罕見羣儒之論述此自信之過遂蔑視諸先
輩耳春風辭二首云春風起兮花殘有美人兮江干三
年不見兮路漫漫遠莫贈兮木難歲崢嶸兮將暮心惆
悵而難言及榮華之未落曷不騁夫翠鸞使我執手兮
盤桓春風起兮花落有美人兮江閣三年不見兮路渺
漠遠莫致兮金錯日窅窅兮下山竹紛紛兮解籜及青
春之未徂曷不跨夫黃鵠使我並坐兮偕樂

朱國祚字兆隆號養淳秀水人以太醫院籍補順天府學生萬歷癸未賜進士第一除修撰歷官戶部尙書兼武英殿大學士加少傅卒贈太傅諡文恪有介石齋集

朱朗詣云先大父文懿公嘗過秀水文恪不出迎旣升堂先公意不懌詢之則文恪袍帶畱質庫方令人取之歎息不置其清介如是詩亦非肉食人語正如冰荷在壑冷香襲人

陸麗京云易稱知幾詩詠明哲朱文恪足當之聞利瑪

竇進異物公曰此輩小智足以惑人將來必有助之更
歷法者景陵詩派初行公覽之驚曰安得此亡國之音
吾不忍見之也知幾其如神乎

俞右吉云王獻之能爲一筆書陸探微能爲一筆畫郭
恕先能爲一筆風箏圖朱太傅天台詩雖五十言一氣
融貫卽謂之一筆也可詩云人言天台高四萬八千丈
中有瀑布泉飛流衆山響多少采藥人石梁不得上我
思勵壽藤削作過頭杖拄上最高峰雲中一拊掌

吳巨手云元時杏花齊化門外最繁東岳廟石臺羣公

賦詩張譙傳爲盛事葛邏祿易之詩云上東門外杏花
開千樹紅雲遶石臺最憶奎章虞閣老白頭騎馬看花
來至明城東花事衰郊西漸盛萬歷後摩訶菴杏花多
至千株吾鄉朱太傅養淳詩云摩訶菴外袖吟鞭繁杏
春開十里田曾與村翁舊相識看花不費酒家錢承平
之日翰苑風流後先一致也

李廷機字爾張晉江人萬歷癸未賜進士第二授
編修歷官太子太保禮部尙書文淵閣大學士
卒贈少保諡文節有集

文節清畏人知奈爲黨論所攻攢譏竦諫而君子之守
確然生時以帖括名詩非專務聞蟬一絕正自翩翩詩
云五雲初霽曙光流垂柳千條蔭御溝兩岼新蟬啼不
住隔林遙送漢宮秋

劉應秋字士和吉水人萬歷癸未賜進士第三授
編修歷官國子監祭酒致仕卒贈禮部侍郎諡
文節有劉大司成集

文節儒臣非有言責而上書請東朝冠昏劾首輔彈中
樞可謂古之遺直已其言有二云近代論相多取諸詞林

詞林雍容雅度一切齷齪猥瑣曾不關其慮博而習于
故靜而徹於幾能以事外之身策事成敗則惟詞林勝
矣寥寥數言其占地步不淺詩非所務無戾雅音

葉向高字進卿福清人萬歷癸未進士選庶吉士
授編修歷官坊局南吏部侍郎召爲禮部尙書
入直東閣以少傅予告再召爲少師兼太子太
師吏部尙書中極殿大學士卒贈太師諡文忠
有蒼霞草

東林諸子奉福清爲倫魁沙汰江河和調水火海內服

其公忠歸田之日蘊藉風流銜左相之窪尊賄東山之
綦墅詩品在山林臺閣之間諸體皆具送林客部南歸
云幾年共逐帝京塵此日那堪別恨新畫省風流傳諫
草黃扉事業媿絲綸故園載酒宜清晝客路聽鶯屬暮
春君到里門應北望長安猶有未歸人

郭正域字美命江夏人萬歷癸未進士改庶吉士
授編修歷中允諭德庶子遷南京國子監祭酒
入爲詹事掌翰林院升禮部右侍郎卒諡文毅
有黃離草

文毅坐妖書繫獄九死不悔可謂骨鯁之臣其論樂府
云今人全用擬議而無變化令人讀之如挾陳人口中
珠殆爲于鱗輩發也又言文章不可學一家詩必自三
百篇漢魏六朝下至唐人皆在胸中筆底乃稱作家蓋
有志而未造其詣者長安道云長安道春無花夏無草
何不歸來山中好遣祀景陵恭紀云宣皇陵廟天山裏
王氣蔥蔥鎖帝梧只見丹臺餘寶鼎不聞銀海繞金鳧
千官露舄朝珠隴五夜雲車下紫都記得當年巡幸日
道旁駐輦問農夫

宣德十年事

廬山五老峰云湖中五老峰

去天不盈尺澗底白雲生五老頭俱白

岳元聲字之初嘉興人萬歷癸未進士除旌德知縣改大名府教授轉國子監博士進監丞升工部主事歷員外郎中疏論首輔奪情落職起南京光祿少卿轉太常少卿再轉南太僕卿遷南兵部右侍郎進左侍郎有潛初子集

侍郎立朝侃侃不阿里居有不平事弗避嫌怨力排衆議以歸於正所謂鄉先生沒而可祭於社者集中韻語罕存寄弟一律云梅花花信春應早楊柳柳州種定曾

天邊白雨愁卑溼瘴後黃茅苦鬱蒸秋風小鳥供行饌
暗壑修蛇挂古藤騷鸞續錄聞初就可似吳船范致能
此詩曾以題扇蓋本岑嘉州嬌歌急管雜清絲之作後
騷鸞錄暨公集均失載殆不知者嫌其失粘而刪去之
也

于若瀛字子步濟寧衛人萬歷癸未進士除戶部
主事歷官右僉都御史巡撫陝西卒贈右副都
御史有弗告堂集

念東詩格未超然不屑作輒熟語晚投清江浦云淮水

吞江浦孤帆晚復開樹移沙岬轉波逆海潮迴人語迎
邨雞漁燈拂櫂來繫舟猶未穩寒漏已頻催雨宿潼關
云明燈虛館淒清夜細雨蕭蕭亂客腸秋入關門悲鼓
角年來驛路老星霜家臨濟水菰蘆白隴接南山黍穀
黃千里故園愁阻絕夢還京國亦他鄉自注云時寄家
京邸清泉寺云滿谷西風椒葉稀穿林片片凍雲飛荒
原車馬應無數閒殺山僧坐翠微

徐學聚字敬輿蘭谿人萬歷癸未進士除浮梁知
縣調吉水擢禮科給事中山爲山東提學副使

歷福建布政使尋以右僉都御史巡撫福建卒

贈副都御史

宏正以前實錄儲祕館薦紳罕得寓目此祝希哲九朝
野記徐昌穀翦勝紀聞等書多齊東野人之語自華亭
在政府抄有副本弇州見之故史料始得其實敬興國
朝典彙一編亦從實錄采摭者也詩亦尙聲格惜所傳
不多夜宿日觀峰禪房云岱宗面面削芙蓉時有卿雲
出漢封杖履中天干象緯風烟下界起蛟龍河流舊繞
滄溟遠練影斜懸紫翠重夜半石牀天籟發夢中錯認

景陽鐘

朱長春字太復烏程人萬歷癸未進士知尉城常
熟陽信三縣人爲刑部主事削籍有太復文集
太復頗類孫太初其宰陽信狀海濱風土如海暗雲連
舍春寒雨近城沙田惟種黍鹵井不通泉過雨如霑雪
無風自落沙白沙風裏下黃日霧中生薄祿供糲藥齋
廚費水錢頗盡其致他如折藕露華白采菱秋水香悠
然西湖曲坐對南屏山高樹晨光動空山衆響聞麥花
來社燕小雨破春泥落日餘高柳空江起暮鐘酒船晴

盡出賽鼓暝猶聞纜外春沙沒燈前獨樹斜蒼藤綠戶
結翠鳥落階飛驛火依沙出春星傍浦懸孤飛江上鳥
半滅雨中山皆秀句也晚學修真鍊形蓋不得志而有
託蒙叟訓其登梯累十重學翀舉而墮地幾殞殆未必
然

湯顯祖字義仍臨川人萬歷癸未進士除南太常
博士遷南禮部主事謫徐聞典史量移知遂昌
縣有玉茗堂集

義仍填詞妙絕一時語雖斬新源實出於關馬鄭白其

牡丹亭曲本尤極情華人或勸之講學笑答曰諸公所講者性僕所言者情也世或相傳云刺曇陽子而作然太倉相君實先令家樂演之且云吾老年人近頗爲此曲惆悵假令人言可信相君雖盛德有容必不反演之於家也當日婁江女子俞二孃酷嗜其詞斷腸而死故義仍作詩哀之云畫燭搖金閣真珠泣繡牕如何傷此曲偏只在婁江又七夕答友詩云玉茗堂開春翠屏新詞傳唱牡丹亭傷心拍遍無人會自招檀痕教小伶其後又續成紫簫殘本身後爲仲子開遠焚棄詩終牽率

非其所長

姚思仁字善長秀水人萬歷癸未進士除行人選
江西道御史巡按山東河南升通政司參議大
理少卿應天府尹入爲通政使轉工部右侍郎
歷尙書太子太傅有萊竹堂遺藁

肅皇帝信薊州人李昇嵩縣人刁騰之言分遣中貴崔
閔主事沈應乾千戶仝爵李鉉至其地相視銀礦是時
遼東衛軍姜賢亦奏開蓋州歸州之礦遂以賢爲礦長
至萬歷間陳開礦之利者紛紛於是中貴四出海內騷

然姚公爲巡按仿鄭俠流民圖撰開采圖說進呈力請
罷役不聽既而開礦者爭相仇殺羣盜蠭起畿甸則齊
本數李庸史籍周言張世才石賓河南則張住朱世安
趙仲保蘭一枝王西安山西則張守清郭貴三張盡忠
許廷珍寧夏則楊戩本欲利國而國幾危矣公嘗注律
以律文簡而易晦乃用小字釋其下 本朝頒行大清
律實依公所注本也公居鄉孳孳爲善年九十一考終
余幼時猶及見之

盛萬年字恭伯秀水人萬歷癸未進士除刑部主

事歷工部郎中出爲福建按察副使歷廣東貴州江西按察使遷雲南布政使未任卒有拙政

編附詩

盛公浮湛藩屏數歷有年當其司臬羊城值倭人入寇躬擐介冑乘城擊破之於錦囊所嘗以一人攝五監司事案無畱牘其還家詩云三黜已甘投嶺外一帆今喜到江鄉所居梅湖饒有魚稻之利築場納稼專以寶賚訓子孫先疇至今未改云

殷都字無美蘇州嘉定人萬歷癸未進士除廬陵

靜志居詩話

卷十五

三

扶荔山房

知州入爲兵部員外歷郎中調南刑部京察去
官

無美藉甚詩名而遺集罕傳離薺園一篇爲王元美作
也詩云蘭生在深谷寧畏惡草滋受性偶不同托根從
所宜夙齡負耿介中路遭嶮巖棄置纓與綬歸來尋故
蹊南山荒豆田東陵沒瓜畦躑躅不自得爲園且栖遲
上有護草堂下有春草池光風旦夕至引觴以爲怡蘭
者自爲蘭薺者自爲薺達觀詎離俗全生甘息機寄言
謝人徒殊調勿見疑園在州治鸚哥橋東有山有池亭

日壺隱曰睟髮軒曰鷄適室曰碧浪曰小憩後池曰芙蓉沼元美嘗自爲作記

黃居中字明立晉江人萬歷乙酉舉人自上海教諭遷南京國子監丞有千頃齋集

監丞銳意藏書手自抄撮仲子虞稷繼之歲增月益太倉之米五升文館之燭一挺曉夜孜孜不廢讎勘著錄凡八萬冊墳土未乾皆歸他人插架深可惋惜也寄兒云愛子遙相送臨岐轉憶家囊空嗟久客歲晏又天涯鬢逐風塵短心驚道路賒離情兼旅思一倍惜年華

附錄愚山云明立專勤學古得異書必手自繕寫僑
居金陵年八十餘猶篝燈誦讀達旦不勑古稱老而
好學斯無媿焉

靜志居詩話卷十五